

關里文獻考

闕里文獻考卷九十九

子孫著聞者第十五之二十七

嗚呼汾紱我孔氏子孫著聞者凡生平大節以及遺言軼事官閥游歷之細罔不博採遐搜勒爲家傳旣又念賢媛淑女代不乏人略而弗書非所以著內訓示壺範也獨是婦人之行不出閨闕雖有懿德表見爲難其著者大抵皆以節烈受旌於

朝始得表異里閭垂名不朽然

國家成例命婦不旌守節非在卅歲以下過廿年以上者不旌輕身以殉夫者非特請不旌於是得旌者又寥寥矣惟衍聖恭愍公之生祖母陶氏以

特

恩賜額得祀節孝祠陶氏大興處士承德之女也早寡撫子承祀子

卒又撫孫教育動有經法時宗子幼弱外侮頻仍其得保全成立者皆陶氏之力康熙二十三年

聖祖幸魯聞其賢

御書節並松筠四字賜之年八十一卒

賜祭葬其元孫婦王氏宛平人祖熙保和殿大學士父克昌刑部郎中
王氏年及笄歸六十九代贈衍聖公繼獲爲室二十六而寡事堂上
以孝聞姑徐太夫人尤愛憐之其子廣榮承祖襲公爵旣壯以其德
聞於

朝乞有所以旌異者

天子嘉焉

賜御書曰冰霜勁節卒亦祀節孝祠其他列女可考者則有五十七代
孫認妻吳氏年二十四而寡遺孕生公擎撫以長爲娶室生子彥太
不數年公擎又卒遺妻歐陽氏年二十六亦厲志自守姑婦相依育
幼孤卒就成立又諗女媛適王綸未逾年綸沒女袖綸所讀書自縊
死同棺而葬五十八代孫公田妻顧氏公雷妻張氏公楊妻尋氏並

於明正德六年遇流賊死節又公緒女年十七未醮爲流賊所執義
不受辱賊殺而支解之五十九代孫彥詰妻王氏年二十五而寡守
節七十餘年撫育幼孫宏復等各有成業卒年百有二歲又彥禱妻
楊氏年二十六夫卒無所出食貧守節終身不嫁又彥珍妻劉氏年
十九而寡守節四十三年又彥霄妻胡氏亦於正德六年爲賊所迫
投井死又彥臣妻王氏彥麟妻宋氏六十代孫承浦妻王氏並同時
遇賊守節死又承贊妻霍氏年二十二而寡舅姑並垂老霍爲人傭
以其直奉甘旨兼撫幼孤苦節四十餘年又承鉅妻涂氏夫死自縊
三日顏色如生又承筠妻閻氏年二十一而寡家徒四壁撫孤守志
事姑以孝聞姑死水漿不入口者四日苦節歷五十餘年又承展妻
苑氏年十九夫亡遺孤甫六月以長以教卒就成立又承楫女適徐
繼擢年十九甫生子而夫死守節五十餘年又承唐女適王思晉年
十九而寡守節四十餘年六十一代孫宏憲妻賈氏亦於正德六年

遇流賊死節又宏進妻顏氏年二十而寡守節四十七年又宏山妻陳氏年二十一而寡守節五十餘年又宏祚妻顏氏年二十一孀居至七十九歲子聞器妻顏氏年十九孀居至五十八歲當事同旌其閭曰一門貞節六十二代孫聞詮妻張氏守節歷三十七年又聞訓妻顏氏嗣素女也年十七未婚而聞訓沒誓以死殉父母防之甚密得聞自經死又聞義妻李氏年十八夫死無嗣有夫弟尙幼護持教育俾就成人又聞宦妻王氏年二十而寡有子貞朗亦婚於王居三年貞朗沒遺孤尙運長娶杜氏逾年尙運又沒子衍鳳生甫彌月三婆共撫之有司旌其門曰三節又聞籍妻朱氏媳顏氏及二女當聞籍任西寧兵備道時番酋馬安邦作亂積薪戶外俱投火中死六十三代孫貞珏妻韓氏明末寇至抱子奔避爲寇得挾之上馬韓投地大罵寇怒而殺之貞乾女許字明奉國將軍朱觀燦未婚而夫沒守貞者終身又伊陽知縣貞璞女孝媛字顏光朝光朝幼喪母歷十有

二載猶執器增悲願廬於墓側父以其幼弗之許光朝遂自縊媛時年十七隨父在任所聞而哀之亦自縊死又貞女適守衛林廟自戶陳治世夫亡守節年百有三歲卒六十四代孫尙仔妻朱氏年二十二夫亡守節四十五年有司欲旌之采曰此自婦人分也何旌之有堅辭乃已又尙恪妻朱氏尙恪有心疾多恙嘗人莫敢近朱氏委曲事之及尙恪死守節教子有如嚴父焉又尙頑妻朱氏明鉅野王之宗女有孝行王舅年九十病危朱割股療之病尋愈又尙鍼妻陳氏年二十而寡守節四十四年又尙變妻宋氏尙變渡河沒於水宋欲以身殉之舅姑防護甚至一日凌晨忽失所在徧求不得越日見衣帶汙池上蓋婦已投水死矣又尙誠女適顏懋賢夫亡守節四十年又尙泰女適顏懋英懋英母張本以少寡而懋英又早世子崇楫生甫三歲婦與姑苦志共守教子嚴厲不少假借卒就成立有夫從弟懋芹貧而天遺妻亦孔氏女也迎與同居事事資給之共守節以

老焉六十五代孫五經博士衍桂妻王氏大理寺卿湘之女也年十八撫二女守志事舅以孝聞又衍海妻孫氏保慶通判光祖之女也守節四十三年又衍縉女適荀旺如夫亡時年二十七守節四十餘年六十六代孫興裕妻胡氏夫死守節教子有成里人重其節將白於有司請旌之胡辭曰未亡人撫兩月之孤誠不意有今日也今至此抑幸矣豈敢濫邀旌表乎里人重違其意乃止又興燁妻顏氏考功郎中光敏女夫死絕粒五日誓不欲生所親以大義諭之乃勉食孝事堂上數十年如一日既侍夫及舅姑疾久博涉方書常製丸散以濟鄉里之疾獨者工文翰著有恤緯齋詩晚香堂詞又興景女適顏肇奇結褵甫二載而夫死苦節自守雖極貧窘奉舅甘旨不敢缺又舉人興祥女適顏紹範年二十三而寡家貧爲鄰里織紉以養姑自食不給或以橡實充飢夫從弟紹節妻亦孔氏女夫卒舅姑以家貧勸其他適則囑指誓曰姊能然我獨非人乎如必不相容有死而

己兩婦相依守節終身又興紆女適郭某蚤寡子及孫曾又三世皆
天能苦志以守終其身六十七代孫毓玠妻陸氏柏鄉知縣賓女年
十九而寡孝舅姑教嗣子守節五十年卒又毓懿妻姚氏荆門知州
士萊女幼端靜通經史性篤孝嘗割臂以療姑疾毓懿爲臨淄訓導
卒於官姚氏治棺斂已卽絕食三日臥不起臨淄諸生跪寢門外請
曰母不思返吾師櫬乎曷歸而後畢志姚曰諾乃弭食旣扶櫬歸家
人謀所以葬姚曰丐於人則夫子不受若稱貸後將誰償者左右惟
一婢乃嚮之以襄事旣葬自爲文以祭其夫復絕粒十有四日而卒
乾隆二十一年桐城張若本來知縣事高其節爲立祠祀之又毓洙
妻葉氏明魯王府指揮際時女苦節四十年又毓琰妻呂氏守節三
十五年又歷城教諭毓榮女年十七適顏紹助紹助有母患癰瘻動
止須人紹助卒女將以身殉姑謂曰若獨不念我耶乃不死居平幽
感傷懷數至嘔血顧不令姑知愉色婉容惟恐傷其志也卒年八十

餘歲其姊適顏壁光年二十四而寡亦以守節著稱六十八代孫傳
鉅妻李氏刑部侍郎濤女婚已有期而傳鉅卒於塗李聞訃毀容成
服誓不他適舅毓埏姑任往勸慰之終不能奪遂隨舅姑歸代夫侍
養守貞二十餘年又傳鉅妹麗貞適歷城戴文誡一載夫亡守節四
十餘年與李並以節稱麗貞能詩與興煒妻顏氏相倡和所著有藉
蘭閣詩草發情止義士人誦之以上六十六人頗有年跡可述者又
五十七代孫誓妻沈氏五十八代孫公應妻宮氏公係妻顏氏六十
代孫承元妻范氏六十一代孫宏柱妻王氏宏智妻顏氏六十二代
孫聞敕妻王氏聞孝女適史全經六十三代衍聖公妾郭氏又貞雷
妻朱氏貞德妻孫氏貞德女適陳士柱六十四代孫尙桐妻顏氏尙
祿妻朱氏六十五代孫衍棟妻楊氏衍鎰妻吳氏衍光女適魏成六
十六代孫興紓妻周氏興京妻陳氏興人妻王氏興煜妻黃氏興擴
妻魏氏興楊妻桂氏興調妻傅氏興嗣妻黃氏興隆女適薛維敬興

宗女適郭大智與先女適郭大有六十七代孫毓玠妻張氏毓鏹妻
楊氏毓綜妻鍾氏毓健妻劉氏毓漢妻顏氏毓璋妻顏氏毓坦妻上
官氏毓富妻董氏六十八代孫傳煥妻章氏傳培妻苑氏凡三十八
人無年迹可述而孔氏女適人者又有顏嗣坤妻宋永徵妻陳意善
妻陳思道妻王傑妻顏伯松妻顏光繪妻顏紹謨妻陳思寬妻趙之
芳妻顏紹德妻顏紹乾妻顏紹眼妻顏紹珩妻顏懋桂妻顏伯瑛妻
顏懋暎妻黃孫綺妻凡十有八人並以節著而皆失其代系云

述曰顏母元官壺範不可得而述矣紹聞衣德質有其人騰烈揚徽
歷世相望嗚呼賢矣哉至若宋氏胡氏有而不居獨崇讓節是尤識
高行茂者矣

闕里文獻考卷九十九終

闕里文獻考卷一百

敘考第十六

闕里文獻考何爲而作也懼闕里文獻之尠徵而作也闕里文獻曷爲乎尠徵問嘗考之舊籍載闕里故實者有孔氏實錄孔庭纂要素王事紀世家譜東家雜記祖庭廣記聖門志孔門僉載等書或缺佚不傳或家有藏本而未經鋟刻學士大夫罕有見者明弘治間會稽陳鎬始哀集舊聞著爲闕里志一書綱舉目張事跡粗備顧考據失精去取無當其後載經增輯止綴述恩蔭更雜以簿書之文章而於前人紕繆繁漏之失舉未有所匡正君子病焉康熙丁丑族祖聘之嘗別纂新志一變舊志體例頗有所增益而蕪雜傳會失更過之故其書久而不行今去丁丑又六十有六年矣

國家崇獎師儒典禮殷盛凡所以宏敎澤而闡道揆者莫不展義盡誠度越前古乃近世以來鮮有愛素之士集其事而筆之書者一二

宗老或能言其大概而齒髮頽落半就遺忘更數十年後行益微忽後有作者其孰從而求之汾年十一而孤太夫人督之嚴爲童子時卽命隨諸長者後出見賓客習禮法暇更取家門故事及朝廷所以褒崇先聖澤苗裔於無窮者一一親教之且曰數典而忘其祖小子之羞也汾受而識之不敢忘乾隆戊午春我

皇上有事於辟雍

召取衍聖公率聖賢子孫入京陪祀汾與觀禮禮成隨宗子詣

闕謝

召見乾清宮

賜予殊渥俾肄業國子學竊自念遭際

聖明仰沐恩蔭得以不耕不織優異於編戶而頑鈍暴棄無以紀

國恩述祖德用昭示於永永雖萬死不足塞責故所遇殘編脫簡金石斷爛之文莫不掇拾摩娑手自著錄復稽之故家遺老以證辨所

聞而益恢擴其所未見雜有所得記而藏之甲子春今宗子大修譜牒汾與編次之役故事修譜畢卽增輯志書譜成姪廣祚因以請汾曰志與史相表裏非下識所可及若網羅放佚以備修志者之採擇則固宿願也於是出篋中所藏始事排纂明年秋登賢書又明年春上巡幸東魯親釋奠汾以講書導

駕被

恩命授內閣中書舍人旣官京師時與當世名公卿上下其議論更得質叩典墳習熟掌故公餘無事恆以書篋自隨尋被選入軍機處旋擢戶部主事倬直

禁庭始少暇日甲戌之夏今相國諸城劉公籌餉西鄙奏以汾偕行受任簡書軍機旁午編錄之事因遂中輟其明年夏達瓦齊就俘蔵事還京會

天子以武功耆定重

幸闕里祭告汾本以聖裔蒙

恩擢用至此高厚無可報稱今大禮將舉冀得先驅歸魯掃除塗茨效犬馬奔走之勤然後迎伏道左遙觀慶成庶有以竭愚忱而寧寢息隨據情上請得

旨報可丙子春適宗子以公事與有司齟齬陳奏失當當事者劾汾實左右之吏議落職負罪嬰釁理無可寬悔恨傍徨永甘廢錮乃蒙

天恩前洗旋予賜環感激悚慚無階答謝因念變化氣質惟在讀書謝客杜門以贖罪過偶檢廢簏見未成舊業頗自惜其散漫乃更剪蕪穢刊謬誤益以邇年恭遇諸

盛典勒爲一書名曰闕里文獻考於辛巳之秋方克就緒蓋汾自少時卽有志於此中間再經作輟閱十有六年而今始成於此見汾之蹉跎懶廢爲何如也是考也爲門一十有六爲卷一百首述姓源溯自出也繼以先聖年譜尊祖也遂及宗子系葉傳世家也爲世系考

第一凡十卷墓爲體魄所藏廟以歲時安有故次之啓聖林及書院
卽附焉爲林廟考第二凡三卷盛德百世必祀自漢唐以來封諡屢
更祭秩載易而配享亦代有異制至

親詣辟雍

駐學聖里以及銜

命祭告皆宜有紀爲祀典考第三凡四卷大宗秉鬯主祀事者也小宗
奉專祠分承祀事者也凡百執事駿奔在廟贊襄祀事者也登降之
儀尊俎之器金石之奏戶役供掃除祭田給餼盛牲醴皆祀典中之
節目也則又析之爲世爵職官考第四凡一卷禮考第五凡四卷樂
考第六凡三卷戶田考第七凡一卷闕里依廟建學古稱廟學今爲
置官師廣登進超郡邑而擬成均矣爲學校考第八凡二卷山川爲
靈秀所鍾城洫壯宮廟之衛爲城邑山川考第九凡一卷昌平世胄
聚族而居譜牒不明昭穆曷辨爲宗譜考第十凡一卷列史藝文董

錄篇目省郡邑志或專採文章而不收經籍茲考兼史志體例而用之分爲孔氏著述考第十一凡一卷藝文考第十二凡十卷先賢先儒已略見祀典而出處事蹟則不可弗著爲聖門弟子考第十三凡一卷從祀賢儒考第十四凡三十卷宗譜一門僅載世次及流寓支派若族有僞異正足表示後昆用考家傳列行實而以登仕籍者及列女附焉爲子孫著聞者考第十五凡二十七卷敍者抒也次也抒寫其次第敍所以作者之意也言弗雅馴不敢以冠篇首而以敍考第十六終焉凡一卷旣標其篇目而復卷爲之述贊曰

厥初生民元鳥降祥革夏受命遂奄四方載祀六百封國于商有宋讓厲別氏分姓銘鼎益恭禱山啓聖有開必先則篤其慶卷之一述先聖姓源

粵我先聖生民未有道大莫容所如不偶歲越一千百氏紛糅傳會傳訛弗衷於道刪述斯編尙亦有舊卷之二述先聖年譜

先民有言紹聞衣德肯構負薪責在世嫡詩禮儀庭中庸示極繼繼承承衍此聖澤卷之三述世系二代及三代

世入戰國異學分門謹是儒術弗墜舊聞京順相魏子魚仕陳備恪炎漢奕奕湯孫卷之四述世系四代至八代及九代子魚以下嗣宋公之系

子襄之胄五世博士經術傳家遂師帝子襄成啓封用錫厥嗣宗聖奉聖欽於世世卷之五述世系九代至二十六代

江左喪亂文教莫宗元魏崇聖苗裔是封有隆勿替易侯而公河山帶礪與唐始終卷之六述世系二十七代至四十二代

下隸倡旣謀我宗祐天祚神明遺孤走匿長訴於朝殲是凶逆舊物克還用賓王國衍聖易封傳世罔極卷之七述世系四十三代至四十七代

宋室南渡魯入金源居者行者各守王官南絕北斬冢嗣弗傳思誠

非嫡據非所安卷之八述世系四十八代至五十三代

太宗不嗣器必有歸勉勉文肅宗黨所推傳序錫爵克昌厥後遭遇承平尊榮安富卷之九述世系五十四代至六十四代

皇矣高祖躬際

與朝荷

天子寵班首百僚我曾繼之厥修益劬我祖我考德音孔昭爰及孫子不滿以驕於千萬年克守宗祧卷之十述世系六十五代至七十一代

天啓兆域鬼神守之以待有德卜吉於茲泗南防北啓聖所藏越三十里萬古相望卷之十一述至聖林及啓聖林

鬱鬱葱葱素王之宮有丹者棟有崇者墉昔惟環堵今擬

九重匪僭匪侈用報乃功卷之十二述至聖廟

聖毓尼邱教行洙泗出宰中都不威而治舊蹟所存闕宮高揭孫作

中庸鄒嶧載祭卷之十三述尼山洙泗聖澤中庸諸書院

有德者崇有功者報於惟聖師首天立教王追祖禰配列賢儒千秋
萬歲秩祀無渝卷之十四述歷代洎我

朝褒崇聖賢之典

有嚴辟雍於論鼓鐘

天子宿戒百辟溫恭園橋審聽多士雲從臣與觀禮亦睹斯容卷之十

五述

詣學之典

洪惟

聖祖魯邦式臨我

皇嗣極亦積斯忱三舉

玉趾對越維欽稽諸前古孰儼於今卷之十六述

幸魯之典

闕里聖居異彼鄉校

國有大典罔弗虔告卷之十七述

遣告之典

爵我家嗣位同賓恪官我子弟庭列朱祿奉璋戔戔寢廟奕奕卷之十八述世爵職官

於穆清廟歲祀孔虔曾孫秉炤對越在天執事有恪式禮莫愆卷之十九述闕里祭儀

聖主尊師度越百代改定祭儀三獻九拜

遣告不時肅將匪懈卷之二十述

皇帝親祭及遣官祭告諸儀

上丁釋奠古禮不傳登降有序始自開元由宋逮明代有損益備列於篇用資考覈卷之二十一述釋奠舊儀

制器尙象義各有云古人用質後世以文稽諸故府斑駁瑣瑣核

維旅則有司存卷之二十二述禮器

樂以昭德舞以象功金聲玉振莫罄形容神之聽之肅肅雍雍卷之二十三述樂章

作樂殷薦其詩孔多譜用散佚乃不可歌幸有存者可弗紀邪卷之二十四述樂譜

樂有五音寓器而出差以毫釐謬乃不啻審厥精微是稱神智卷之二十五述樂器

俾彼原田藝我稷黍以享以祀匪今斯古胙我苴茅錫我編戶子子孫孫有人有土卷之二十六述戶田

先覺先知萬世所仰延及苗裔廟學載敬有官有師有廩有餼造我子弟無荒以嬉卷之二十七述廟學建置首末

蒸蒸莘莘育此多士登明選公維君子使上爲國楨下亦家祉薈彼蒿蓬茂茲杞梓卷之二十八述漢唐以來孔氏及賢裔之貢舉者

截截尼防湯湯洙泗地應星裏都建古帝靈鍾秀毓萃我素王昔仰
宗國今景宮牆卷之二十九述城邑山川

運丁朱梁聖澤幾斬一綫中興備歷坎坷綿綿瓜瓞以至於今子孫
千億如魚如林卷之三十述宗譜

聖道不行晚事筆削詒厥孫謀亦勤述作總我百家別以七略按籍
以稽亦云浩博卷之三十一述孔氏著述

洪惟

宸章星雲糾縵體並典謨辭陋唐漢以

聖表聖揆同道貫拜手敬錄藝文之冠卷之三十二述

聖製

麗牲之文用志興革稽古有作視此貞石卷之三十三述碑文

事舉必書意垂永久侈而不文惟以速朽卷之三十四述記

原文著義乃弁斯首意或未伸識語於後卷之三十五述序跋

論取理長辨以詞勝考核精詳無稽勿聽卷之三十六述論辨解考
形容盛美頌聲乃作小言層層弗叶于格卷之三十七述頌

贊不虛美銘或寓箴古有作者遺文可尋卷之三十八述贊銘

秩祀有虔奏格在上辭以達誠用冀昭貺卷之三十九述祭文

考彼辭賦古詩之流惟麗以則乃遠俳優卷之四十述辭賦

遊於聖門觀海難水以雅以南六經鼓吹卷之四十一述詩歌

蔚彼杏壇惟賢之宅負劍歌商其樂晨夕道之不行歸我鄉國疏附

先後以近有德卷之四十二述聖門弟子傳

道喪文弊王風載泯維彼哲人不隨俗阻窳過知非問禮得本位於

及門尸祝惟允卷之四十三述蘧子瑗林子放傳

聖王不作諸侯放佚修是春秋以代衰鉞翼翼素臣親承載筆繁公

與穀纂言惟實卷之四十四述左邱子明公羊子高穀梁子赤傳

七雄龍戰中原鼎沸楊墨乘之充塞仁義不有孟子萬古昏瞶樂正

之徒後車翼侍身附青雲名彰奕世卷之四十五述亞聖孟子父孟

門弟子樂正子克公都子萬子章公孫子丑傳

子所雅言詩書執禮祖龍惡之投畀炎火有漢諸儒尙紀厥旨抱缺
守殘自今伊始卷之四十六述高堂生伏子勝毛子萇后子蒼杜子
子春傳

卓哉董生正誼明道求端於天符微有兆夫何主父遂竊其業詩亦
有言愠于羣小卷之四十七述董子仲舒傳

漢世經師人各異說有鄭康成旨歸以一言踰百萬昭揭白日不詭
不隨身亦同闕卷之四十八述鄭子康成傳

孔明王佐澹泊寧靜感激一言託孤寄命炎祚永終厥功不竟管樂
之流誰言公並卷之四十九述諸葛子亮傳

晉尙清談道豐其部旨扇老莊罪浮桀紂桓桓武子獨異羣醜砥柱
中流狂瀾迴首卷之五十述范子甯傳

大道久闕篤生文中太平建築謀臧不從退而著述六經是宗河汾之教世仰高風卷之五十一述王子通傳

楊墨塞路孟子闢之變而佛老昌黎斥之信格豚魚文掃榛莽學者宗師泰山北斗卷之五十二述韓子愈傳

嶽嶽文正伊呂之儔柄國垂憲百辟承流經略西夏膽破虜酋終始一節後樂先憂卷之五十三述范子仲淹傳

布衣上殿天子動色立教蘇湖爲四海式德溫器粹高隱雒陽推行皇極內聖外王卷之五十四述胡子瑗邵子雍傳

洙泗絕學千載不傳元公起宋獨契淵源接顏曾孟啓洛關閩光風霽月萬類陶甄卷之五十五述周子敦頤成補傳

五季陵遲士氣弗振不有健者誰挽文運舐排異端觸忤羣慍天骨稜稜歲寒益峻卷之五十六述歐陽子修傳

河嶽英靈實鍾司馬身係安危望傾夷夏奈何伊人久棄洛下晚乃

得君天已不假卷之五十七述司馬子光傳

伯溫清德精鑒復殊用啓二子爲世大儒道不見用傳諸其徒尹楊

羅李爰逮我朱卷之五十八述程子响顯頤尹子焞楊子時羅子從

彥李子侗傳

橫渠忼慨少年結客學佛學兵反求無得乃誦六經渙然冰釋理一

分殊西銘是飭卷之五十九述張子載父傳

嚴冬肅殺百草萎黃維松與柏獨挺窮荒再顛再蹶肝膽益熱俛仰

二公後先一轍卷之六十述胡子安國張子栻傳

歐國文公集宋大成千秋道統肩以一身及門諸子各守其緒載衍

傳何王金許卷之六十一述朱子松嘉蔡子元定沉黃子幹陳子

淳何子基王子柏金子履祥許子謙傳

高明沉潛性各有近維是褊心亦孔之愆悟自一朝氣質頓變君子

戰勝勇軟賁颺卷之六十二述呂子祖謙傳

世謂儒者迂疎寡效瞻彼荆門匪怒伊教白鹿我我多士翕集覺以晨鐘圓橋雨泣卷之六十三述陸子九淵傳

韓史枋國國步斯訥創名僞學誦言以攻不撓不屈矢厥孤忠在蹇六二蹇蹇匪躬卷之六十四述真子德秀魏子了翁傳

羽翼禮經惟小戴記鄧注孔疏涉以識緯雲莊慨焉爰集其粹由博而約一掃榛穢卷之六十五述陳子澔傳

元起海東國俗椎木仁甫北來士始知學仲平繼之左膠右塾伊洛淵源以似以續卷之六十六述趙子復許子衡傳

草廬浩博經術湛深發爲議論如探淵濶難進易退屢謝朝簪作士太學懷我好音卷之六十七述吳子澄傳

恭顯亂政望之下獄常侍傾仄李杜桎梏士生不辰或羅斯毒不惕不疚修身以俟粹然純儒惟薛夫子卷之六十八述薛子瑄傳

惟靜斯正惟虛斯靈各就所得以養真明良知之學說本孟子流弊

入禪攻擊用起卷之六十九述陳子獻章蔡子清王子守仁傳

蹈虛守寂高明者病求我放心窮理居敬篤信考亭勉勉敦行窮達固殊聲聞則並卷之七十述胡子居仁羅子欽順傳

抑抑清獻正直端純操刀小試遺愛在人一年御史坐不暖席著述程朱服之無斃卷之七十一述陸子隴其傳

啓宗列祀功在傳經吹毛索玷途遇于茲有舉莫廢前冊所稱用羅厥傳以俟後人卷之七十二述荀子况劉子向戴子聖揚子雄鄭子眾賈子遠馬子融盧子植何子休服子虔王子肅王子弼杜子預傳秩秩寢廟主維上公博士肇設分奠中庸有嚴有翼執事溫恭原廟別起更溯厥封卷之七十三述閭禮毓埏傳誌彥繩承寅傳

父兄教先子弟率謹齒德弗尊背議嚶嚶其副舉事亦崇膚敏式是斯人爲族之準卷之七十四述肅元龍涇思楷詮傳

唐命聖裔作宰於鄉更歷千禩代有循良愛流桑梓德音不忘卷之

七十五述勛宗翰思逮克欽克仲克中希範希永讓燮公鏗公珏承
夏宏復聞簡貞堪貞叢尙儉傳

學錄分尊儲公北面學廣間多相觀而善懿哉數君惟邦之彥卷之
七十六述克晏克晏論公瑱貞燦傳

仲和儒者廣見洽聞言尙體要允矣聖孫聘之踵武攝衣

講筵

天子顧我崇階是遷卷之七十七述僖尙任傳

壁經肇啓諸儒莫識定以隸古朗若電激著述是耽後先繼迹爰及
憲公遂疏六籍卷之七十八述安國臧奇豐長彥季彥穎達傳

亮工弘化天子所眈德不充位覆餗用譏四公調鼎弗竟所施天方
艱難非人之爲卷之七十九述光扶緹貞運傳

拾遺補闕責歸臺諫好是正直政用不眩宗有盡臣侃侃司憲或輔
強藩以嚴見憚卷之八十述奭楨戡溫裕敏行道輔文仲思迪思立

聞詩傳

神州重鎮慶緒是使方舉清威京兆坐理持節百粵君嚴東美允武允文式是南紀卷之八十一述休源殘哉毓珣傳

漢網解紐乾綱下移與曹同列渥而不緇其身可哉其節不墮嗟哉弱息視死如歸卷之八十二述融傳

貞侯廉直移孝作忠夙夜匪懈敬爾在公克家令子亦有斯容或操亮節或扇儒風卷之八十三述愉汪國傳

典午東遷故宮禾黍上恬下嬉苟安江左志恢中原君平彭祖諸諸盈庭謬謬奚補卷之八十四述坦嚴傳

彥琳司憲百爾整肅思遠繼之清約厲俗兵應尋陽用覆厥族史以叛書冤哉斯獄卷之八十五述琳之觀傳

弱翁秉正不辱叛黨再使強藩慨當以慷實命不猶禍起搶攘晚有伯英垂名兩廣卷之八十六述巢父勛傳

光祖治獄人稱廉平終以佞佛致損厥名宗文篤孝擢輔前星建言忤眾江漢用行卷之八十七述承恭公恂傳

所居民樂所去民思謂父謂母戴若厥私君魚而下循吏孔多媲美前史甘棠載歌卷之八十八述奮奕賢昌寓端隱括元敬克慧彥祿聞定貞瑄尙鉞尙銑尙惇與詢傳

季將昆仲作吏有聲歷世既遠史軌厥名豐碑屹屹燦若列星凡百有位視此刻銘卷之八十九述宙翊彪傳

水儒民玩道濟以猛廉幹英武四國是靖先謗後歌道愛則等強禦培克則不可並卷之九十述靖靈符琇之延之傳公才彥綸尙則碑慷慨赴死從容就義趨蹈不同齊秉浩氣二十三人忠魂猶毅表而出之可以風厲卷之九十一述德紹宗旦文甫檜承浦聞籍貞璞貞度衍雋典聖傳

先聖有言行在孝經友于兄弟是亦家政立訓垂教祖武是繩匪曰

干譽至性至情卷之九十二述褒蘊彥輔聖聰攷士份貞稔衍劭衍
樟衍球衍佳興永傳

砥厲廉隅硜守信果礫視貨財飴甘湯火方以古人殊類俠者軌道
範義是遠刑禍卷之九十三述祇公怡宏蘊聞舉聞臯貞璠尙果傳
文以載道言亦身華弗淵弗雅譬彼虛車斟酌六籍寢饋百家傳世
行遠君子所嘉卷之九十四述衍稚珪紹安季翊若思至武仲平仲
滋端甫之載思睿諤公恪彥倅承侗宏頡聞詩貞時尙珥衍栻傳
智者審機清不迂俗眾醉我醒無乃枿鑿高士不然寧處於獨亦介
亦孤如金如玉卷之九十五述立元建昱羣述睿傳

士各有志潔身高蹈返璞歸真潛光不耀豈以逃名從吾所好卷之
九十六述淳之沉祐道徽元演公輅貞灼貞時傳

易戒錯履詩刺莠口悖逆隕宗佞亦蒙垢熙先法言亦孔之醜兩無
諱辭用以示後卷之九十七述熙先範傳

學者稽古匪階榮利相彼簪紳稱乃不易幸則事傳否亦名識告爾
後人青雲自致卷之九十八述孔氏在仕籍者

詩追姜妣易首咸恆婦德弗若非家之禎彼美淑姬著範閨門彤管
有煒含章可貞卷之九十九述孔氏列女

于嗟小子罔識今古幸祖神明粗習掌故上追皇初旁及統譜賢儒
載徵秩祀有序禮樂建置廟林爵土稽獻考文勿誣吾祖凡茲纂輯
述而不作後之君子尙亦有取卷之一百述敘考

乾隆二十六年歲次辛巳仲秋既望孔子六十九代孫繼汾敬述
闕里文獻考卷一百終

闕里文獻考卷末

闕里志辨譌

闕里舊志行世已久海內著書家間多引用新志雖久不摹印顧已經鏤刻當世亦有其書其中襲謬仍訛舛錯不少分於諸考中已擇其大者辨論改正其改而未辨者復爲論列如左不敢誣先人惑後世也

舊志世表云世子勝周子姓譜云宋父周生世子勝以家語考之蓋世父勝非世子勝也

又本姓節錄家語本姓解文於微仲生宋公下複宋公二字直接世爲宋卿而脫去丁公申至弗父何二世之系大不可解

又先聖年譜皆主史記故於十七歲云魯大夫孟懿子與兄南宮敬叔往學禮焉考左傳昭公七年孟僖子從公至筮病不能相禮乃講學之及其將死也召其大夫曰禮人之幹也無禮無以立孔口先聖聖

人之後也我若獲沒必屬說與何忌於夫子故孟懿子與南宮敬叔師事仲尼云云是僖子之病不能相禮者雖在是年而命子從學實在死日傳有明據何得襲史記之誤而竟作十七歲事乎且史記之誤索隱已駁之矣

又云二十七歲郊子來朝二十八歲孔子往見郊子而學焉考問官事見於左傳家語並無明年往學之文今特分作兩年似屬臆斷又云二十九歲聞師襄善琴遂適晉學之考師襄魯樂官也史記作在衛事世系考中已辨其誤今云適晉更不知何據

又云三十一歲齊景公遣使來聘孔子適齊考經傳家語史記皆不載齊聘孔子事而孔子適齊在三家共攻昭公魯國大亂後亦非此

年

又云四十七歲魯定公以爲中都宰由司空爲大司寇考是歲爲定公五年陽貨囚季桓子又三年欲盡去三桓不克入於讎陽關以叛

此正陪臣竊柄魯國大亂之日孔子若已登朝豈有恬不爲怪之理且亦萬不能一日安於其位故史記以宰中都爲五十歲以後事其說近理朱子所謂定公初年孔子不仕者正此時也今乃移見行可之仕於此歲豈不大錯

又云五十歲遷司寇考是歲公山不狃以費畔召孔子子路有末之也已語今云遷司寇與論語不合

又云五十一歲以司寇攝朝政考左傳史記並無以司寇攝朝政事惟史記有由大司寇行攝相事語在孔子五十六歲且此語太史公先不能無誤考左傳云夾谷之會孔口先聖相所謂相者卽儋相之相

如齊侯如晉晉士匄相王孫圉聘於晉晉侯享之趙簡子鳴玉以相者是也卽家語所云攝行相事亦指此會事而言若云宰相之相此時季氏正執魯政孔子以異姓之卿焉能起而代之果爾則齊人歸女樂孔子直麾去可矣桓子更安得而受之况相爲商官丞相爲秦

官周無是也今仍史記之謾而復更其年失益甚矣

又宗子世紀云九代鮒字子魚秦始皇并天下召爲魯國文通君拜少傳考孔叢子子魚在秦時隱居不仕至陳涉起兵乃聘爲博士太傅今謂鮒仕於秦不知何據

又云十代忠徵爲博士褒成侯考褒成之封始於十三代霸前此未有也今於十代先書此爵殊屬失考

又云二十八代靈珍孝文帝太和十九年仍封崇聖侯食邑一千戶考崇聖之改爲侯爵實始於二十八代前此蓋崇聖大夫也今云仍封崇聖侯甚不可解

又於三十三代褒聖侯傳中唐太宗貞觀十一年詔朝會位同三品下注云此後世召孔氏子孫朝會之始考漢光武東巡褒成侯序在東后章帝東巡亦助祭明堂與朝會者已久蓋不始於唐貞觀也新志古蹟門云孔子舊宅在孔廟東偏前爲壽堂伯魚聞詩禮處後

爲金絲堂孔鮒藏書處今改建述聖廟考明弘治間李文正公序金
絲堂銘云金絲堂舊在孔廟左廡之東東直故井前直詩禮堂嘗掘
地得石刻知爲孔子故宅比者廟燬而堂獨存新廟旣闢堂地皆入
左廡金絲堂則移而西與詩禮堂正相直據此則金絲堂故址乃改
建左廡未聞改建述聖廟也且述聖子思子在宋時祇配祀鄆國夫
人殿西廡亦未聞別有專廟又敘成化十九年規制云啓聖門內東
有筠亭一座北爲金絲堂改五賢堂而建者也金絲堂之移而西在
弘治廟災後今云成化時已在廟西尤屬錯誤

典籍司樂管勾百戶舊稱禮樂兵農四司新志謂皆有廳事在聖廟
大中門外禮農居東樂兵居西考大中門外並無四司廳事故址且
歷考前朝規制亦未嘗有此說其爲傳會明甚

又祠廟門云南齊世祖永明七年二月己丑詔改築孔子宗祊考南
齊時魯郡已淪入北朝云改築者明別立廟於南都也與闕里無涉

下又云陳後主至德三年詔改築孔子舊廟按此舊廟卽宋齊以來別建於南都之廟亦非闕里事

又云宋仁宗景祐四年孔廟修起講堂成昂爲記考是年未聞有修起講堂事及考碑末行書景祐四年七月重立乃知爲誤以重立碑記之年作始建講堂之年矣

舊志恩例門云景德三年王欽若奏令諸道州府軍監文宣王廟摧殘處量破倉庫頭子錢修葺云云考此乃天下文廟之事何得闕入闕里恩例

新志祠廟門云明太祖洪武二十九年面諭工部侍郎秦逵以闕里先聖降生之地爾工部其卽爲修理云云考明史秦逵以洪武二十二年爲工部尙書二十六年自殺今云二十九年則此人死已久矣又二十九年實無修廟事稽之明史概實二十年也

又云明神宗萬歷三十六年御史王國楨見西廡頽敝乃損俸募輸

云云考王國楨是時實爲兵巡副使非御史也

又云明天啓八年洙泗書院傾圯殆甚世尹孔聞簡捐俸修復考天啓無八年蓋七年事也

舊志祀典門云漢高帝十二年過魯以太牢祀孔子詔諸侯王卿相至郡先廟謁而後從政按史記孔子世家高皇帝過魯以太牢祠焉諸侯卿相至常先謁然後從政今增爲諸侯王且謂出於詔令杜撰極矣

又諡號門云漢和帝永光四年封孔子爲褒尊侯考前史漢並無封孔子爲褒尊侯事此蓋因馬氏文獻通考中有徙封損爲褒尊侯之說故並移之孔子耳不知通考中之尊字乃亭字刊刻之誤卽損亦未嘗封褒尊侯宋史可證也

又祀典門云漢桓帝元嘉二年詔孔子廟置百戶卒史一人掌領禮器春秋享禮出王家錢給大酒直河南尹給牛羊豕各一大司農給

米云云百石之訛爲百戶前考中已辨之矣至出王家錢給大酒直
考漢百石卒史舊碑大字作犬字又後漢書禮儀志明帝永平二年
三月上始帥羣臣躬養三老五更於辟雍行大射之禮郡縣道行鄉
飲酒禮于學校皆祀周公孔子牲以犬是其證也又碑文河南尹給
牛羊豕各一大司農給米乃太常祠曹掾史引辟雍故事對
公府者安得混以爲河南尹大司農有給闕里祭品之事邪

又云魏正始二年帝講論語使太常釋奠以太牢祀孔子注引邱瓊
山語謂前此祀孔子者皆於闕里至是始行於太學考後漢禮儀志
帝幸辟雍行大射禮郡縣道學校行鄉飲酒禮皆祀周公孔子則漢
時已先祀孔子於太學矣恐不始於正始也至新志臨雍門直以此
條爲臨雍講學之始按魏志云正始二年春二月帝初通論語使太
常以太牢祀孔子于辟雍則此乃通論語後之報祭也且所使者太
常帝並不親釋奠何得訛爲臨雍講書之始

新志祀典門云梁元帝初在荊州起宣尼廟帝工書善畫自圖孔子聖像爲之贊考此全與闕里無干

舊志祀典門云魏孝文帝太和十六年詔宣尼廟別勅有司享薦之禮下注云有司廟享始此考魏書禮志於太武帝始光三年二月已載祀孔子於國學至是年二月丁酉詔曰夫崇聖祀德遠代之通典秩禮中古之近規故三五至仁惟德配享夏殷私已稍用其姓且法施於民祀有明典立功垂惠祭有恆式斯乃異代同途奕世共軌今遠遵明令憲章舊則比於祀令已爲決之其孟春應祀者頃以事殷遂及今日可令仍以仲月而饗祀焉凡在祀令者其數有五帝堯樹則天之功巍巍之治可祀於平陽虞舜播太平之風致無爲之化可祀於廣甯夏禹禦洪水之災建天下之利可祀於安邑周文公制禮作樂垂範萬葉可祀於洛陽其宣尼之廟已於中省當別勅有司饗薦之禮自文公已上可令當界牧守各隨所近攝行祀事皆用

清酌尹祭也細繹詔文蓋專爲堯舜禹周公四聖立廟而言故本紀書丁酉詔祀唐堯於平陽虞舜於廣甯夏禹於安邑周公於洛陽下文卽云丁未改諡宣尼曰文聖尼父告諡孔廟不聞更有勅有司享薦之詔未可割裂詔文另作一事且宣尼廟在國學所謂別勅有司者乃國學之有司非牧守之有司也

舊志諡號門云隋文帝贈孔子爲先師尼父考唐房元齡等奏云晉宋梁陳及隋大業以前皆以孔子爲先聖顏回爲先師據此則云贈爲先師者誤也

又云唐太宗貞觀二年尊孔子爲先聖考前房元齡言則隋大業以前已稱先聖矣實不自貞觀始蓋前於高祖時曾改孔子爲先師此時第復其舊耳

又祀典門云宋天禧元年詔崇文館雕印釋奠儀注及祭器圖頒行下諸路以宋史紀志考之蓋大中祥符三年事

新志祀典門云元武宗時皇妹大長公主誦習經史命工塑聖人像金書懿諱於左右按此等事如何載入闕里志且書法亦失體

舊志從祀位次圖東廡列先賢公子良孺奚子容蒧先儒左子邱明高堂子生西廡列先賢壤子駟赤石子作蜀公子肩定左子人郢按公良奚容左邱壤駟石作公肩左人皆複姓也至高堂生漢書不傳其名其曰生者乃當時諸儒之稱如伏生董生賈生之類今誤以生爲名尤爲謬甚

又弟子及從祀先儒傳中所載歷朝封爵舛錯甚多如宋初封曾子參爲瑕邱侯後以封邑與先聖名同改封爲武城侯今乃訛瑕邱侯爲郕侯審是則何必更有改封之事又宋史禮志載崇寧四年追封秦商馮翊侯其後序南宋文宣王廟制東廡位次則又云馮翊侯秦祖郕城侯秦商前後錯亂必有一誤秀水朱彝尊作弟子考據咸淳臨安志定秦祖爲郕城侯秦商爲馮翊侯而以史所載南宋位次爲

誤似爲有據今於秦子祖作鄆城侯而於秦子商亦曰鄆城侯誤中更誤其謬殊甚其他訛者如以有子若卞伯爲汴伯顏子祖臨沂伯爲臨邑伯穀梁子赤睢陵伯爲睢陽伯司馬子耕睢陽侯爲綏陽侯琴子張陽平侯爲平陽侯又周子敦頤於元仁宗延祐六年封道國公乃作至順中種種舛錯不可枚舉新志相沿悉未改正至訛宋封陳子亢南頓侯爲南邢侯則又新志之失考者也

新志臨雍門云北魏道武帝天興四年二月命樂師入學習舞親釋奠先聖先師考魏書並無親字

又云孝文帝太和三年立孔子廟於京師行釋奠禮考魏書及北史立孔子廟於京師在太和十三年且亦並無親行釋奠事

又云陳後主至德三年釋奠先師禮畢會宴王公卿士此幸學賜宴之始考陳書此係太子釋奠並非帝親幸學至釋奠會宴創於宋文帝元嘉中亦不始於此時

又云唐肅宗上元元年仲秋祀於太學又代宗永泰二年修國子學
祠堂成釋奠命宰相及常參官六軍將軍就觀焉又德宗貞元二年
釋奠詔自宰臣以下畢集於國學考唐書禮樂志及冊府元龜此三
條皆命有司行事並不聞天子親蒞何得雜入臨雍一類

舊志祀典門云金世宗大定十四年釋奠先聖考金史是年無親行
釋奠事蓋世宗於是年定釋奠禮樂因卽訛爲親祭耳

新志幸魯門云漢光武帝建武二十二年車駕東巡詣闕里遣宗室
皆詣孔氏宅賜酒肉考漢書是年並無東巡事

又云後魏世祖太平眞君十一年車駕南伐宋自東平趨鄒山十一
月進至魯郡以太牢祀孔子考魏書本紀太平眞君十一年十有一
月辛卯至于鄒山劉義隆魯郡太守崔邦利率屬城降使使者以太
牢祀孔子則世祖固未嘗幸魯縣親祭孔子明甚而新志之訛蓋緣
魏書禮志有云十一月世祖南征至魯以太牢祀孔子耳不知魯郡

在宋時已徙治鄒縣改魯縣爲屬邑魏志之所爲至魯謂至魯郡卽紀之所爲至于鄒山也今去使使者三字又錯認魯郡爲魯縣而入於幸魯門未免失實

又云遼太祖神冊三年建孔子廟次年落成躬詣奠拜按此事與關里何涉而列入幸魯門耶

又云金睿宗天會七年大軍入山東睿宗登杏壇奠拜復詣聖林云云考睿宗者卽國王訛魯朶也以子世宗入繼大統故追諡睿宗其入山東時不過一領軍元帥何得與列代帝王並稱臨幸又天會乃太宗年號今直云睿宗天會七年亦無此書法

又云金熙宗皇統元年二月戊午親詣關里北面祭拜又章宗明昌四年親祀先聖於關里考本紀此二事皆於國學釋奠史有明文今加關里二字而入幸魯門殊屬傳會

新志祭秩門云北魏皇興二年遣使以太牢祀孔子此遣官祭告之

始考遣官祭告漢光武魏太武已先有之不始於此年

舊志祀典門云元仁宗延祐七年遣說書王存義以太牢祀孔子仁宗手香加額以授之按此乃英宗事英宗於是年三月卽位其祭文有云嗣服伊始茲祀告虔是可證也

新志遣告門云元順帝至正二十五年皇太子撫軍冀寧夷夏晏安遣樞密院經歷魏元禮詣關里祭告按太子遣官何可與歷代帝王同在一類

舊志恩例門云元泰定三年山東廉訪使王鵬南言襲封上公而秩四品於格弗稱明年陞嘉議大夫詔給三品印按元史泰定帝四年衍聖公陞三品階至文宗至順三年始以少監歐陽元言改給印章混二事爲一事非是

舊志凡崇聖侯鄒國公紹聖侯襲聖侯文宣公食邑皆臆注爲一千戶而奉聖亭侯則有云二千戶者有云二千戶者考宋史四十四代

公傳晉武帝泰始三年封孔震爲奉聖亭侯邑二百戶北魏孝文帝太和十九年封靈珍爲崇聖侯邑百戶後周靜帝大象二年封渠爲鄒國公邑百戶隋煬帝大業四年改封嗣哲爲紹聖侯邑百戶唐太宗貞觀十一年改封德倫爲襲聖侯邑百戶至元宗改封璫之爲文宣公不著戶數今凡百字皆改爲千字欲以侈大其封不知已蹈失實之誚又新志將改封崇聖侯作南宋元嘉十七年事更屬大謬新志又於食邑云唐咸通間改食實封一百戶宋元仍照舊食實封一百戶按此一無考據皆臆度之詞

舊志云述聖子思子書院卽孟子受業處也國朝弘治十六年順淮世以衍聖公之次子襲翰林院五經博士考學錄公瓚奏請原疏及明史皆在武宗正德二年並非弘治十六年

又五經博士題名云孔聞詩字知言衍聖公弘泰長子以父代兄襲封弘治十六年恩蔭前職孔聞禮字知節衍聖公弘緒次子正德元

年世襲前職按聞禮爲孔氏授五經博士奉祠之始其事在正德二年非元年也若聞詩以廢敘得是職並非奉祠之官今混列於聞禮之上殊爲失實至新志削去恩廕二字改爲初授則直以聞詩爲博士之始益變其真矣

新志職官門載置顏孟二氏博士一作景泰三年一作景泰二年考明史置顏孟二氏博士乃一時事俱在景泰三年如何分作兩歲又云世襲太常寺博士一員宋大中祥符元年幸魯召文宣公親弟孔勛爲太常博士勛子道輔襲道輔子宗翰襲自後孔端朝孔元措孔之載數世相沿考勛係雍熙二年進士初爲太平州推官轉殿中丞通判廣州眞宗東封以王欽若薦召爲太常博士知仙源縣轉屯田員外郎遷太常卿終尙書工部侍郎勛子道輔係大中祥符五年進士初爲寧州軍事推官轉大理丞知仙源縣遷太常博士召爲右正言歷右司諫龍圖閣待制終御史中丞道輔子宗翰以進士知仙

源縣遷太常博士召爲司農少卿歷鴻臚卿刑部侍郎而以寶文閣待制致仕載在宋史及家傳彰彰可考今不知此職爲宋世百僚遷轉之官而見勛父子孫三世皆歷此職遂誤以爲世襲而據以爲今太常博士建置之始元措已於金章宗明昌二年襲封衍聖公貞祐二年授東平府通判以寇阻不得行改授隨朝職事乃拜太常博士旋遷太常丞節度觀察等使是太常博士乃衍聖公兼官亦並非今之世職也至引及端朝之載等展轉傳會謬孰甚焉

舊志載尼山洙泗書院學錄云明正德二年衍聖公聞韶奏改山長爲學錄職視國子監考奏改山長爲學錄者乃公璜非六十二代公也新志見載其奏疏可以考證

新志典謨門載宋天聖元年勅曰孔子廟自祖先以來皆以子孫世知縣事奉祠祭今乃不然非所以崇儒術尊先聖之意其詔自今仙源縣復選孔氏子弟爲之又皇祐三年七月勅曰自國朝以來世以

孔氏子孫知縣事使奉承廟祀近歲廢而不行非所以尊先聖也自今宜復於孔氏子弟中充選考宋史本紀天聖元年無此勅惟皇祐三年云秋七月丙辰以孔氏子孫復知仙源縣事而舊志亦作皇祐三年詔自今仙源縣官復於孔氏子弟中選用而不及天聖元年今所載兩勅文氣略變大意實同不知出於何據

新志世令題名云孔延魯大中祥符四年知仙源縣事孔道輔咸平元年賜進士出身大中祥符九年以大理寺丞知仙源縣事考延魯與道輔本是一人今訛而爲二又道輔乃大中祥符五年進士今作咸平二年亦不是

舊志世尹題名云金世宗大定初思逮入覲授承事郎曲阜令章宗承安二年克昌任縣令按思逮爲元武宗朝人上去金世宗大定初幾一百四五十年其誤無疑至克昌又思逮弟思迪之子其誤更不待辨者矣

又新志云孔澄字世寧五十三代孫治之弟也元大德七年襲曲阜尹考大德中爲世尹者思誠也並無事故澄何以得代其職蓋澄之得是銜者乃其孫克伸之贈官未嘗一日身任縣事何得濫入舊志投官恩澤一門極爲叢雜如聚之封蓼侯臧之拜太常等類非緣聖裔推恩未可概以爲恩澤官也如凡孔氏官者皆列恩澤則所遺又多多矣

又云慶歷五年以宗禎將作監丞知仙源縣數緡後復云慶歷五年以匠作監丞宗亮知縣事下注云卽舜亮按宗禎譜內並無其人而宗亮係進士延之子舜亮係中丞道輔子譜牒昭然何得混而爲一况宗亮並未曾知仙源縣事所書全屬錯誤

新志樂舞門載司樂題名首列施仲德下注云元至大元年由生員任考祖庭廣記施仲德係大都文廟司樂設於至大元年後延祐六年曲阜聖廟亦請設司樂乃引此爲例今錯看文義竟將施仲德爲

曲阜聖廟司樂之始併改建置爲至大元年事豈不一誤再誤

舊志恩澤門云南宋文帝元嘉三年詔十八代孫孔鮒爲百戶主掌
禮器考百戶係百石卒史之訛於戶田考中已詳辨之矣至此事實
漢桓帝之元嘉非宋文帝之元嘉有碑可證何得篡改

新志學校門云奉祀生元至元間勅除孔氏太常太祝太常禮儀院
判等官明永樂間改授太常奉祀及祀丞等官供應祖廟祀事弘治
十二年議准額選四氏老成俊秀子弟奉祖廟祀事考舊志及祖庭
廣記元明間未聞有授孔氏子孫太常太祝院判奉祀祀丞之事惟
譜載元五十四代思善由濟寧路教授爲太常寺太祝思迪爲湖廣
都事辭疾起爲太常禮儀院判尋陞同知本院事思立由太常寺太
祝轉新河縣尹五十五代克康由翰林國史院典籍轉太常寺太祝
是數人者雖曾歷是官然不過循資遷轉耳何可牽引爲奉祀生建
置原委至明永樂間孔氏並無任太常官者所引更不知何據

新志樂舞門所敘歷代樂章多顛倒失次前考皆查據國史及祖庭廣記更定而樂器中之侈陳失實引據錯誤者更不可指數

舊志序樂章云金以寧爲名有永寧靜寧肅寧和寧安寧五曲章宗又改四曲曰來寧淨寧溥寧德寧惟肅寧一曲仍舊考金世宗大定十四年定釋奠樂章迎神奏來寧盥洗奏靜寧升殿奏肅寧奠幣初獻奏和寧降階奏安寧酌獻堯國公奏肅寧鄒國公奏泰寧亞終獻奏咸寧送神奏來寧共有九曲並無所謂永寧者今去肅寧泰寧咸寧之名而增入永寧且曰五曲者誤也至章宗明昌六年別頒闕里樂章迎神奏來寧盥洗奏淨寧升降奏肅寧奠幣奏溥寧酌獻正位二配亞終獻皆奏德寧凡四章送神奏歸寧亦共有九曲今漏歸寧之名而曰改四曲者皆誤也至云惟肅寧一曲仍舊更不可解如云名同也者則同者尙有來寧不止一曲如云詞同也者則兩曲又迥別樂章具在昭然可按總之不識世宗所定者爲國雍之樂章宗所

頒者爲闕里之樂截然兩事訛而爲一故曰改曰舊展轉繆戾耳
新志古蹟門云唐鐘唐開元二十七年所頒宮縣罇鐘今存其一縣
於詩禮堂螭鈕粟文製造精工清廟之重器也按此鐘今縣於杏壇
無銘不能辨鑄造年月第唐無頒樂器於闕里事卽史載樂用宮縣
亦祇兩京爲然安得遽斷此鐘爲唐開元物

又云元太宗九年衍聖公孔元措奏燕京南京等處尙有太常禮樂
官及樂工人等乞行拘刷事奉詔旨若有前項人等并家屬用舖馬
頭口起移赴東平府地方住坐分付孔元措收管令本路課稅所量
給口糧養濟就於本廟閱習聽候朝廷不測用度按此元初禮樂未
備因元措之奏朝廷遂令董其事於本廟閱習其所閱習者乃太常
樂工與闕里無與也何得闕入樂門

舊志樂舞生門云成化十二年閒祭酒周洪謨奏增樂舞生李整等
八十名又云弘治九年閒太常寺卿崔志端奏准添樂舞生二十六

名俱照前優免按此乃國學之事見有奏疏可考全與闕里無涉

新志祠廟門云唐元宗開元十三年東封回幸孔子宅給百戶以供灑掃下又云二十七年詔賜百戶供灑掃考給灑掃百戶書作二十七年是也若十三年止聞給近墓五戶並無給百戶事所書殊屬錯誤至戶役門反漏卻二十七年事而給灑掃百戶及賜近墓五戶混作一條皆書爲開元十三年更誤極矣

舊志佃戶門云宣德間戶部踏勘地土五屯佃戶共存五百戶計二千丁見丁一百大畝考此事於給田門已載有正統四年八月諭旨此又云宣德間彼此互異

新志祠廟門云元成宗大德九年給曲阜林廟灑掃戶二千八百人以應灑掃考大德時所給復者止二十八戶並無二千八百人第此事之訛由於大德重修廟碑碑內云復戶二千八訛十爲千蓋書者之誤新志不究其誤臆斷爲二千八百人益失真矣又戶役門云元

成宗大德九年八月給曲阜林廟灑掃戶新舊共一百一十五戶計一千八百丁事同一年而人則減去一千前後自相矛盾且一百一十五戶乃明洪武時所給亦非元時事也

舊志林廟門云孔顏曾孟四氏學魏黃初二年創建宋祥符二年稱爲廟學元延祐間又益以顏孟二氏考增入顏孟二氏乃宋哲宗元祐間事今訛爲元之延祐至宋真宗有大中祥符年號係四字紀元者不得截去大中二字單書祥符

新志學校門云宋宣和四年幸太學詔令先聖後在學者賜上舍出身以後三氏學生俱如國子監例考徽宗本紀宣和四年帝幸太學祇載學官諸生恩錫有差並無賜上舍出身語卽是年或有其事要亦國子諸生盡沾恩澤孔氏子孫有在國學者不過亦邀普惠而已諒非專爲先聖後設也至牽引以後三氏學生俱如國子監例更屬穿鑿傳會

又云元延祐元年勅賜監書於學考此乃宋哲宗元祐元年事非元仁宗延祐元年也

舊志學田門云元統元年江西僉事任忙古台以墨坐沒入鄆城縣私田八頃九十畝屋二十七間奉旨付孔氏子孫爲業考原碑係贍廟而兼及學者不得專入學田門又碑云田八頃八十九畝數亦不對

新志古蹟門云鄆邑魯之附庸先聖晚年退息於鄆作息鄆操今尙有息鄆村又名勝門云息鄆村在城東南十里先聖晚年還轅息鄆休遊於中今其村巷風物皆存古意元翰林院檢閱官孔涇之子孫一戶居焉考史記世家云孔子既不得用於衛將西見趙簡子臨河不濟乃還息乎陬鄉作爲陬操以哀之而反乎衛據此則陬鄉應在晉衛之間明甚又明張敏撰孔涇墓志云涇永樂己酉以疾終於西鄆里第則息鄆村者本西鄆村也今訛陬鄉爲魯之鄆邑又改陬操

爲息鄒操復易西鄒村爲息鄒村以實之展轉謬戾大失古人存信之義不獨以鐘樓爲端門伯禽臺爲北擒臺等類僅出傳會已也新志有典謨一門首紀歷朝詔誥內載宋元豐七年五月詔自今春秋釋奠以鄒國公孟子配食文宣王設位於兗國公之次荀況揚雄韓愈以世次從祀於二十一賢之間並封伯爵考此乃宋史紀事之詞非詔文也載之於篇殊爲不類

又載宋徽宗崇寧四年遣官詣闕里致祭祝文曰惟王固天攸縱誕降生知經緯禮樂闡揚文教餘烈遺風千載是仰俾茲末學依仁游藝謹以制帛牲齊粢盛庶品祇奉舊章式陳明薦以兗國公鄒國公配尙饗考崇寧四年並無遣官祭告事且此乃頒降天下祝文格式非遣官專祭之詞

又云崇寧五年遣官詣闕里致祭祝文曰惟王金聲玉振集厥大成有道立教垂憲萬世茲率舊章謹以制帛牲齊粢盛庶品式陳明薦

以先師堯國公邴國公沂國公鄒國公配尙饗考崇寧五年亦無遣祭事且此文乃南宋時頒降天下祝文格式文中見列四配是其明證何得混入北宋妄謂崇寧五年有遣官專祭事

舊志載金泰定二十二年皇帝遣孫康昭告於至聖文宣王曰國家禮崇儒術云云考此乃金章宗明昌六年文誤作泰定二十二年且金亦無泰定年號山東省志不知爲章宗事而改泰定爲大定作金世宗事更屬妄繆

新志載元至正二十一年皇帝謹遣御史中丞察罕帖木兒致祭於大成至聖文宣王曰粵稽聖德巍巍難名儀範百王而師表萬世者也欽我皇元雅尙斯文屢嘗遣使禋祀於廟庭其崇重之道度越千古頃緣妖寇鷁張梗我王化垂及五稔享祀之典遂成曠弛茲者躬承上命爰討不庭大振天聲而東土克寧魯邦戾止遐瞻牆仞軍旅事殷未遑與祭敬遣輔行敢申昭薦細玩文義乃察罕帖木兒遣人

代祭之詞也增加皇帝謹遣四字而列入典謨一類甚屬非是

又載宋蘇洵孔子論考此論並非老蘇之文乃大蘇所著者文又截去上半首止載半篇更非體製

新志載蘇軾孔融論曰文舉以英偉冠世之資云云考此乃大蘇孔北海贊之序今截去贊詞易而爲論全失真矣

舊志載漢索隱述贊孔子之先肇于商國云云考此贊乃唐司馬貞史記索隱孔子世家贊今以刻於史記中加以漢字序於魏晉之上實屬失考

又載宋大中祥符元年廷臣奉勅分撰七十二子贊其所書人名及贊詞與廟中舊碑多參差不對

又載先聖歌辭十一首內將極鄙俚語亦信爲夫子之言誣聖人甚矣

又載宋趙鼎手植檜詩一首考此趙鼎乃元人官尙書祠部郎中知

兗州非宋之趙忠簡也

又於弟子門云顏子生於魯昭公二十一年卒於哀公五年考夫子厄於陳蔡在哀公六年是時從遊尚有顏子又伯魚年五十方卒其卒之時孔子已六十九歲爲哀公十一年顏子之卒又在其後則非卒於哀公五年明甚再考家語顏子年止三十二歲其卒旣不在哀公五年所云生於昭公二十一年者亦誤也

又聞達子孫門云十六代子建元子又云二十代伯序魯都督按子建名建伯序名承今皆遺其名而書其字旣非體例且承乃督郵非都督也

又云十九代震字元上舉孝廉除郎中拜尙書侍郎治書侍御史博陵太守除下邳相終河東太守按此卽博陵太守彪也廟中有古碑可證且震乃二十二代宗子襲封宗聖侯何得以彪混之

新志林墓門有諸郡史墓下注云孔謙之墓也按家譜謙爲郡曹吏

舊志云謙爲郡諸曹史與此皆誤也當依碑作郡諸曹史爲是

舊志聞達子孫門云二十代又字元僞魏諫議大夫下又云文魏大鴻臚考晉書孔衍傳云祖父魏大鴻臚而譜內載又爲魏諫議大夫大鴻臚至文則並無此人蓋卽又字之訛耳

又云二十七代晉閭長子晉尙書令考晉譜內並無其人

又云二十九代士邈琳之子有父風揚州中從事考琳之子名邈官揚州治中從事史今於官職則脫書而於名添士字皆失考據

又云三十一代安碩子北齊青州法曹參軍考碩之子名安齊今編齊字

又云三十八代文瑾齊鄉子兗州都督府功曹考齊鄉乃三十七代文宣公生三子惟晤惟昉惟時並無名文瑾者

又云下十二代元善字德新宋寶慶二年進士終泰州學教授考元善譜列五十一代今誤入五十二代

又云南史有孔盪孔嗣之孔僉僉子淑元僉兄子元素孔子祛孔子雲孔廣孔道皆聞達表表者史失其世次姑附錄於此云云考此九人內惟嗣之史稱魯國人孔道徽族祖前者已爲立傳其他譜既不列其名史復不著爲宣聖之冒焉知其非他族一概收入殊非闕疑之道

以上各條皆事之不容不辨者故特爲論列他若新志於趙吳興之序陳陽譜而誤以爲闕里大譜五十四代衍聖公思誠父祖墓碑而誤題爲思誠碑葛守禮所撰六十三代公張夫人墓志而誤以爲嚴分宜作以及字句錯繆割裂重複之處不可枚舉緣無大關係故概置不辨恐後人罪我吹毛求疵也繼汾識

闕里文獻考卷末終